

# PPV IPT-UMS terima 'Pek Hero' daripada KBSS

Oleh Yap Siong Han  
UB 30.07.2021 P. 07

**KOTA KINABALU:** Sebanyak 160 set sumbangan 'Pek Hero' dari Kementerian Belia dan Sukan Sabah (KBSS) disampaikan kepada petugas barisan hadapan di Pusat Pemberian Vaksinasi Insitituti Pengajian Tinggi Universiti Malaysia Sabah (PPV IPT-UMS).

Sumbangan disampaikan Pembantu Menteri KBSS, Andy Muhammad Suryady Bandy kepada Naib Canselor UMS, Profesor Datuk ChM. Ts. Dr. Taufiq Yap Yun Hin ketika mengadakan lawatan ke PPV IPT-UMS, semalam.

Katanya, sumbangan itu adalah salah satu program yang dijalankan oleh KBSS sebagai tanda penghargaan

dan usaha menyantuni para petugas barisan hadapan.

"Sumbangan ini sebagai tanda penghargaan KBSS kepada semua petugas barisan hadapan di UMS yang bertungkus lumus memastikan proses pemberian vaksinasi berjalan lancar sejak hari pertama PPV ini dibuka," katanya.

Beliau juga turut menggesa orang ramai akan segera mendaftar sebagai penerima vaksin melalui saluran yang disediakan oleh kerajaan.

"Sasaran imuniti kelompok akan lebih mudah dicapai sekiranya proses pemberian vaksin mendapat kerjasama dari semua pihak.

"Saya juga mengharapkan komitmen dari kerajaan Persekutuan agar bekalan

vaksin untuk negeri Sabah dipercepatkan, agar tidak berlaku penangguhan pemberian vaksin seperti sebelum ini," katanya.

Pada lawatan itu, beliau turut diberikan taklimat mengenai proses dan jumlah pemberian vaksin di PPV IPT-UMS sejak pusat itu mula beroperasi pada 14 Jun 2021.

Sehingga kini PPV IPT-UMS mencatat kumulatif pemberian sebanyak 21,449 dos dengan jumlah agihan 3,000 vaksin sehari.

**SIMBOLIK:** Andy (dua kiri) menyerahkan bantuan makanan kepada petugas PPV IPT-UMS, turut kelihatan ialah Taufiq (duduk).

